



TIMBALAN PERDANA MENTERI

KENYATAAN MEDIA

OPERASI PEMBENIHAN AWAN (OPA) DI NEGERI KELANTAN

Kerajaan telah bersetuju untuk melaksanakan Operasi Pembenihan Awan (OPA) di Negeri Kelantan pada 21 hingga 23 Jun 2024 susulan permohonan oleh Lembaga Kemajuan Pertanian Kemubu (KADA) melalui penyelarasan antara Agensi Pengurusan Bencana Negara (NADMA), Kementerian Pertanian dan Keterjaminan Makanan (KPKM), Jabatan Meteorologi Malaysia (MetMalaysia), dan Tentera Udara DiRaja Malaysia (TUDM).

Operasi yang akan dilaksanakan selama tiga (3) hari ini diharap akan meningkatkan paras air Sungai Kelantan agar dapat mengairi kawasan-kawasan pertanian yang terjejas ketika ini. OPA adalah tindakan awal yang dilakukan Kerajaan Persekutuan bagi mengatasi penyusutan air Sungai Kelantan dan menangani impak fenomena cuaca panas serta Monsun Barat Daya yang dijangka berterusan sehingga penghujung September 2024.

Malah, taburan hujan yang rendah yang dicatatkan bermula Februari hingga April tahun ini telah menyumbang kepada penyusutan paras air Sungai Kelantan serta mengganggu operasi pam di seluruh Kawasan KADA. Bagi membolehkan Rumah Pam Kemubu beroperasi sepenuhnya, Sungai Kelantan perlu mencapai aras air pada ketinggian 4.90 meter, tetapi KADA hanya merekodkan aras air sungai Kelantan terendah iaitu 2.19 meter pada minggu kedua April 2024 lalu.

Justeru, sebagai Pengerusi Jawatankuasa Pengurusan Bencana Pusat, saya telah meluluskan penggunaan dana Tabung Kumpulan Wang Amanah Bantuan Bencana Negara (KWABBN) sebanyak RM 5 juta bagi menjayakan Operasi Pembenihan Awan ini.

Usaha ini diharap dapat segera memberikan sumber air yang mencukupi di kawasan tadahan hujan sepanjang tempoh negara berhadapan dengan cuaca panas dan kering, khususnya di Negeri Kelantan.

Saya juga berharap usaha bersepadu yang dilaksanakan ini dapat membantu meningkatkan kapasiti air di kawasan tadahan hujan dan seterusnya menjamin bekalan air dapat disalurkan kepada pengguna tanpa sebarang gangguan. Saya juga telah menyarankan pihak NADMA dan KPKM untuk melaporkan perincian hasil Operasi Pembenihan Awan ini pada 23 Jun 2024 nanti.

-Tamat-

Ahmad Zahid Hamidi

Timbalan Perdana Menteri

Pengerusi Jawatankuasa Pengurusan Bencana Pusat (JPBP)

19 Jun 2024